

Minister di Enseñansa Arthur Dowers di bishita na stichting BIS y HOPE

Proyecto “Branding” ta sigura mucha un ‘upgrade’ di conocimiento total



ORANJESTAD - Minister di Husticia y Enseñansa Arthur Dowers acompaña pa Miss Aruba srta. Larisa Leeuwe, a haci un bishita di cortesía na dos organisacion di San Nicolas cu ta dedica nan mes na yuda muchanan y hobennan di menos recurso di den e barío di San Nicolas. Prome e mandatario a bishita Stichting BIS “Baseball International School”. E organisacion BIS ta combina un “tra’i merdía” y training di baseball pa mas o menos 40 hoben entre 6 y 12 aña. Despues di scol e hobennan ta bay hunto na Centro di barío Lago Heights caminda nan ta ricibi un lunch. Entre 2or y 4or di atardi nan ta ricibi ayudo cu nan huiswerk pa despues di 4or nan bay dedica nan tempo na training di baseball.



Banda di e aspecto educativo y deportivo e hobennan ta ricibi training tambe riba aspectonan social manera disciplina, control propio, perseverancia, determinacion y concentracion.

E docentenan y trainers ta

ricibi guia di profesor dr. Ir. Hubert Rampersad kende a crea e metodo “Authentic Personal Branding”. CEDE Aruba a pone un suma disponibel pa sostene e proyecto aki. Despues Minister Dowers a sigui bishitando Stichting



HOPE, “Help Our People Excel”. HOPE ta un organizacion cu ta yuda muchanan pa progresa den nan estudio primario. Minister Dowers a haci un bishita na e centro di encuentro di e hobennan na Watapana Gezaag. Hunto cu docentenan di diferente school na San Nicolas ta scoge e muchanan cu lo participa den e proyecto. E muchanan ta den klas 5 y 6 di onderbouw. E proyecto ta sigura e muchanan no solamente di un guia profesional cu nan huiswerk sino di un upgrade di conocimiento den su totalidad. Apesar di guia

cu nan huiswerk e programa ta encera tambe preparacion pa e Colegio Toets y actividad riba tereno social y deportivo. Tambe ta siña e muchanan e reglanan basico di etiquette y protocol. E muchanan ta haya les den un setting familiar caminda nan por comunica den un manera hopi efectivo cu e grupo y e lidernan. Un grupo di 12 mucha ta participa e aña aki den e proyecto. Aruba Bank pa dos aña consecutivo ta facilita e iniciativa por completo. Minister Dowers ta felicita e Stichting BIS y Stichting HOPE cu nan bunita iniciativa. □